

Evening Dogri News

17 June 2024

18:15 Hrs

Headlines

- पच्छिम बंगाल दे रंगापानी स्टेशन पर इक्क माल गड्डी दे कंचनजंगा एक्सप्रेस कन्नै टकराने करियै रेलवे दे 3 कर्मिये सने घट्टोघट्ट 9 जने दी मौत।
- देसै दे होरने हिस्से आंगर समूलचे जम्मू संभाग च बी ईद-उल-अजहा धार्मिक जोश जज्वे ते रिवायती अंदाज कन्नै मनाई जा रदी ऐ।
- प्रधानमंत्री नरेंद्र मोदी होर कल उत्तर प्रदेश दे वाराणसी च प्रधानमंत्री किसान सम्मान निधि तैहत 20 ज्हार करोड़ रुपें शा बद्द 17मीं किस्त जारी करंगन।
- गृह मंत्रालय नै जम्मू संभाग दे रियासी जिले च बस पर होए दे आतंकी हमले दी जांच एनआईए गी सौंपी दिती ऐ।



Train-Accident

पच्छिम बंगाल दे न्यू जलपाईगुडी स्टेशन कश अज्ज बडुलै इक्क मालगड्डी दे पिच्छे थमां आई बज्जने करियै सियालदाह जाने आहली कंचनजंगा एक्सप्रेस दे दो डब्बे पटरी थमां उतरी गे जिस करियै घट्टोघट्ट 9 जने दी मौत ते 50 होर दुए जख्मीं होई गेन। रेलवे सूत्रें मुजब इक्क कंटेनर ट्रेन सिग्नल गी पार करियै कंचनजंगा एक्सप्रेस दे पिच्छले हिस्से कन्नै जाई बज्जी। तोआई रेलवे बोर्ड दियां चेरमैन ते मुख कार्जकारी अधिकारी जया वर्मा होरें दस्सेया जे हुन बचा अभियान पूरा होई गेआ ऐ। उनें दस्सेया जे सिग्नल दी अनदिक्खी करने आहलें लोको पायलट दी मौत होई गई ऐ ते कंचनजंगा एक्सप्रेस दे गार्ड दी बी जान चली गई ऐ। अगरतला-सियालदाह रस्ते दे सब्बनें स्टेशनें पर हैल्प डेस्क स्थापित कीते गेन।



PM-Train Accident

प्रधानमंत्री नरेंद्र मोदी होरें पच्छिम बंगाल च होए दे रेल हादसे पर डूंगा दुख ते बसोस प्रगट कीता ऐ। प्रधानमंत्री होरें इक्क सोशल मीडिया पोस्ट च गलाया जे पच्छिम बंगाल च रेल दुर्घटना दुखदाई ऐ। उनें हादसे च जान मोआने आहले लोके दे परोआरने कन्नै हमदर्दी जतांदे होई बसोस ते जख्मिये दे तौले नरोए होने दी प्रार्थना कीती। श्री मोदी होरें रेलवे दे अफसरे कन्नै गल्ल करिये हालात दा जायजा लैता। उनें आखेआ जे राहत ते बचा आहले कम्म जा ना। श्री मोदी होरें प्रधानमंत्री राश्ट्री राहत कोष थमां हादसे च जान मोआने आहलें दे नेडमें रिश्तेदारें गी 2-2 लक्ख रुपें दी सींधी सहायता देने दा ऐलान कीता ऐ। जख्मिये गी 50-50 ज्हार रुपे दित्ते जांगन। तोआई हादसे आहली थाहरै पर पुज्जे दे रेल मंत्री अश्विनी वैष्णव होरें आखेआ जे हादसे दे शकार लोके गी बद्दी दी सींधी सहायता दिती जाग। उनें आखेआ जे मौत दी स्थिति च 10 लक्ख रुपे, सख्त तौरा पर जख्मीं होए दे लोके गी ढाई-ढाई लक्ख ते मामूली तौरा पर घायल लोके गी 50-50 ज्हार रुपे दित्ते जांगन।

P-VP-Train Accident

पच्छिम बंगाल दे दार्जलिंग च अज्ज हेए दे रेल हादसे पर राश्ट्रपति द्रोपदीम मुर्मू ते उपराश्ट्रपति जगदीप धनखड होंरे बसोस प्रगट कीता ऐ। राश्ट्रपति होंरे इक्क सोशल मीडिया पोस्ट च आखेआ जे दार्जलिंग च रेल दुर्घटना करियै लोकें दी मौत दुख पज्जाने आहली ऐ। उनें गलाया जे उंदी हमदर्दी ते प्रार्थना दुखी परोआरें दे कन्नै न। श्रीमति मुर्मू होंरे जखिमयें दे तौले नरोए होने ते राहत बचा आहले कम्में च कामयाबी लेई प्रार्थना बी कीती। उपराश्ट्रपति जगदीप धनखड होंरे सोशल मीडिया पोस्ट च दुखी परोआरें बक्खी गहरा दुख ते बसोस प्रगट करदे होई जखिमयें दे तौले नरोए होने दी कामना कीती।



Eid-UI Azha

कुर्बानी दा त्यौहार ईद उल अजहा अज्ज देसै दे बक्ख-बक्ख हिस्सें च धार्मिक जोश जज्बे कन्नै मनाया जा करदा ऐ। लोकें अज्ज बडुलै ईदगाह ते मसीतें च ईद दी नमाज अता करने परेंत इक्क दुएं गी गले लाइये मुबारकबाद दिती। दिल्ली च जामा मस्जिद, फतेहपुर मस्जिद ते शाही ईदगाह च बी किट्टे होइए लोकें ईद मनाई। इस मौके पर इमामें लोकें अग्गे अमन रमानदारी ते सद्भावना बनाने दे कन्नोकन्नी भाईचारे दी भावना कन्नै त्यौहार मनाने दी अपील कीती। ईद-उल-अजहा दा त्यौहार हजरत इब्राहिम हुंदे आस्सेआ अल्ला दे हुक्म दी पालमा करदे होई अपने इक्कले पुत्र दी बलि देने दी इच्छा दे चेतें च मनाया जंदा ऐ। देसै दे होरनें हिस्सें च बी पूरे जोश कन्नै ईद दी नमाज अता कीती गेई। इस मौके सुरक्षा दे सुद्दे बंदोबस्त कीते गेदे न।



Eid-Greetings

राश्ट्रपति द्रोपदी मुर्मू, उपराश्ट्रपति जगदीप धनखड ते प्रधानमंत्री नरेंद्र मोदी होंरे ईद दे पवित्र मौके पर देशवासियें गी मबारकबाद दिती ऐ। श्रीमति मुर्मू होंरे इक्क सोशल मीडिया पोस्ट च आखेआ जे ईद-उल-अजहा त्याग ते बलिदान दा त्यौहार ऐ जेडा लोकें गी अपनी खुशियें गी सब्बनें कन्नै बंडुने दा सनेआ दिंदा ऐ। उपराश्ट्रपति जगदीप धनखड होंरे लोकें गी एकता, दयाभाव ते इक्क जुटता दे मुल्लें पर बचार करने दा आह्वान कीता। प्रधानमंत्री नरेंद्र मोदी होंरे आखेआ जे ईद उल अजहा दा एह मौका समाज च आपसी भाईचारा, हिरख प्रेम ते इक्क जुटता दे बंधन गी होर बी तगडा करोग। उनें सब्बनें दे खुशहाल ते सेहतमंद रौहने दी कामना कीती।



Eid

देश दे बाकी हिस्सें आहला लेखा जम्मू-कश्मीर च बी ईद-उल-अजहा दा त्यौहार धार्मिक श्रद्धा ते हर्षोल्लास कन्नै मनाया गेआ। रामबन जिले च अकीदतमंदें बक्ख-बक्ख इलाकें च मस्जिदें च जाइये नमाज अदा कीती।

डोडा जिले च बी ईद उल अदहा दा त्यौहार अकीदतमंदें धार्मिक भाव कन्नै मनाया। मुख्व कार्यक्रम डोडा ईदगाह च होआ जित्थे ज्हारां बद्दे श्रद्धालुएं नमाज ए ईद अदा कीती। पुंछ जिले च बी बडुलै थमां मस्जिदें च नमाजियें दी भीड दिक्खी गेई। मस्जिद ते ईदगाहें गी बडे शैल सनाहकडे ढंगै कननै सजाया गेदा हा। मुख्व कार्यक्रम दा

आयोजन पुंछ दे ईदगाह ते जम्मू मस्जिद च कीता गेदा हा। जम्मू खित्ते दे बक्ख-बक्ख हिस्सें आहला लेखा रजौरी जिले च बी ईद उल अदहा दा त्योहार धार्मिक श्रद्धा कन्नै मनाया गेआ।

रियासी जिले च अकीदतमंदें रियासी दे त्रिंथा ईदगाह च रियासी आतंकी हमले दे पीड़ितें लेई दुआ मंगी। उनें हमले च जख्मीं होए दे लोकें दे जल्दी नरोए होने दी बी प्रार्थना कीती।

उधमपुर च बी ईद दा त्योहार बडे जोश कन्नै मनाया गेआ। मुख्ब कार्जक्रम आदर्श कालोनी ईदगाह च आयोजित होआ जित्थे बक्ख-बक्ख इलाकें थमां आए दे लोकें ईद दी नमाज अदा कीती।

कठुआ जिले च बी ईद धार्मिक भाव ते हर्षोल्लास कन्नै मनाई गेई। कठुआ दे जामिया मस्जिद ईदगाह मैदान च ईद दी खास नमाज अदा कीती गेई ते देश दी शांति ते सुख समृद्धि लेई दुआ कीती गेई।



PM-Kissan

प्रधानमंत्री नरेंद्र मोदी होर कल उत्तर प्रदेश दे वाराणसी च प्रधानमंत्री किसान सम्मान निधि पी.एम किसान तैहत 20 ज्हार करोड़ रुपें शा बद्द दी 17मीं किस्त जारी करडन। 9 करोड़ 26 लक्ख लाभार्थी करसानें गी किस्त दी रकम सिद्धे उन्दे बैंक खातें च पाई दित्ती जाग। इस योजना तैहत अजें तगर 11 करोड़ शा बद्द करसान परोआरें गी 3 लक्ख करोड़ रुपें शा बद्द दा लाहू थहोई चुके दा ऐ। कल 18 जून गी केंद्र शासित पदेश जम्मू-कश्मीर च दऊं थाहरें सने देस भरै च 50 बक्ख-बक्ख थाहरें पर लग्गने आहले कार्जक्रमें दौरान केंद्री मंत्री ते मन्ने-परमन्ने दे लोक मौजूद रौहंडन। प्रधानमंत्री हुंदे रफ्तरै च राज्यमंत्री डॉक्टर जतिंद्र सिंह होर शेरे कश्मीर कृषि विज्ञान टेक्नोलाजी यूनिवर्सिटी स्कास्ट जम्मू च लग्गने आहले समारोह च शामिल होडन। केंद्री गृह राज्यमंत्री नित्यानंद राय दक्खन कश्मीर दे पुलवामा जिले च समारोह च शिरकत करडन। जम्मू-कश्मीर च पीएम किसान निधि योजना दे करसान लाभार्थियें दी गिनतरी 8 लक्ख 46 ज्हार 266 ऐ। इनें करसानें च कुल 182.55 करोड़ रुपे तकसीम कीते जांगन। कार्जक्रम दौरान प्रधानमंत्री स्वयं सहायता समूहें दी 30 ज्हार शा बद्द महिलाएं गी कृषि सखी दे तौरा पर प्रमाण पत्र बी प्रदान करंगन। श्री मोदी होर इस्सै म्हीने दी 18 ते 19 तरीक गी उत्तर प्रदेश ते बिहार दा बी दौरा लांगन।



Shah-NIA

केंद्री गृह मंत्रालय नै जम्मू खित्ते दे रियासी जिले च हाल च गै यात्रुएं दी बस पर होए दे हमले दी जांच अज्ज राश्ट्री जांच एजेंसी एनआईए गी सौंपी दित्ती गेई। एहू आतंकी हमला 9 जून गी संझा लै होआ हा। हमले परैत बस खाई च जाई पेई ही जिस करियै 9 लोकें दी मौत ते 33 होर दुए जख्मीं होए हे। एहू फैसला केंद्री गृह मंत्री अमित शाह हुंदे आस्सेआ नमीं दिल्ली च लगातार दऊं बैठकें च जम्मू-कश्मीर दी सुरक्षा स्थिति ते श्री अमरनाथ जी दी सलाना यात्रा दी तैयारियें दी समीक्षा दे इक्क दिन मगरा आया ऐ। एहू बैठकां रियासी जिले च बस पर होए दे आतंकी हमले ते केंद्र शासित प्रदेश च किश होर आतंकी घटनाएं दे मद्देनजर सद्दी गेदियां हियां।



CDS-Sec. Meet

चीफ ऑफ डिफेंस स्टॉफ जनरल अनिल चौहान होर अज्ज जम्मू दे इक्क रोजा दौरा पर इत्थे पुजे। श्री चौहान होर खित्ते च सुरक्षा स्थिति ते अभियानें सरबन्धी तैयारिणं दी समीक्षा करंगन। सरकारी सूत्रें मुजब जनरल हुंदा एह दौरा केंद्री गृह मंत्री अमित शाह हुंदे आस्सेआ कल सुरक्षा स्थिति ते सलाना अमरनाथ जात्तरा दिणं तैयारियें दी समीक्षा करने दे तुरत मगरा लगगा रदा ऐ। सूत्रें दस्सेआ जे सेना प्रमुख होर नगरोटा च 16 कोर मुख्यालय पुजे, जित्थे ओहू खित्ते दी सुरक्षा स्थिति ते सुरक्षा बलें दियें तैयारियें दी समीक्षा करंगन। उनेंगी उत्तरी सेना कमांडर ते जीओसी सने सेना दे शीर्ष कमांडरें आस्सेआ जानकारी दिन्ती जाग। जम्मू संभाग च बदारेदे आतंकवाद कन्नै निब्वडने ताई रणनीति तैयार करने आस्तै बक्ख-बक्ख स्तहें पर सुरक्षा समीक्षा बैठकें दी इक्क लड़ी आयोजित कीती गई ऐ।



Mock Drill

सलाना अमरनाथ जात्तरा थमां पैहले पुलस दी तुरत कार्रवाई करने आहलियें टीमें क्यूआरटी ते विशेष अभियान समूह एसओजी नै अज्ज जम्मू दे आधार शिविर च इक्क व्यापक माँक ड्रिल दा आयोजन कीता। केंद्री गृह मंत्री अमित शाह हुंदे आस्सेआ सुरक्षा स्थिति ते सलाना अमरनाथ जात्तरा लेई कीती जा रदियें तैयारियें दी समीक्षा मगरा एहू गैहू पुट्टी गई ऐ। 52 दिन चलने आहली अमरनाथ जात्तरा औंदी 29 जून थमां शुरू होआ रदी ऐ ते 19 अगस्त गी सम्पन्न होई जाग। एहदे मद्देनजर अज्ज पुलस नै भगवती नगर जम्मू दे यात्री निवास च इक्क व्यापक माँक ड्रिल अभ्यास कीता। अधिकारिक सूत्रें मुजब एहदे च सब डिविजन मुख्यालय दी तुरत कार्रवाई करने आहली फर्स्ट रिस्पोंडर टीम सने सब डिविजन दे क्षेत्रीय अधिकारियें हिस्सा लैता। इस अभ्यास च एसओजी जम्मू सने बक्ख-बक्ख क्षेत्रीय पुलस अधिकारियें ते उंदियें तुरत कार्रवाई करने आहलियें क्विक रिएक्शन टीमें बी हिस्सा लैता। इक पुलस अधिकारी नै गलाया जे एहदा उद्देश्य पूरी टीम गी व्यवहारिक प्रशिक्षण देना हा तां जे उनेंगी कुसा बी अप्रिय घटना दा सामना करने लेई पूरी चाल्ली तैयार कीता जाई सकै। पुलस नै जंदे बुधवारें जम्मू खित्ते च चेतावनी सरबन्धी परामर्श जारी कीता ऐ जेदे च उनें लोकें गी कुसा बी संदिग्ध माहनू जां चीजें दी जानकारी सांझी करने लेई गलाया ऐ।



Gadkari-Meeting

सड़क परिवहन ते जरनैली शिडक मंत्रालय दे केंद्री मंत्री नितिन गडकरी होरें अज्ज श्रीनगर च केंद्र ते जम्मू-कश्मीर यू.टी दे अफसरें कन्नै लगगी दी इक्क उच्चि सतह आहली बैठक च जम्मू कश्मीर दियें महत्वै आहिलियें जरनैली शिडकें ते सुरंग परियोजनाएं दी समीक्षा कीती।



PM-Yog Video

21 जून गी मनाए जाने आहले 10में अंतरराष्ट्रीय योग दिवस शा पैहले प्रधानमंत्री नरेंद्र मोदी होरें अज्ज सोशल मीडिया पर इक्क वीडियो पाया जेदे च ओहू भद्रासन करा करदे ना। वीडियो सांझा करदे होई प्रधानमंत्री होरें इस गल्ला पर जोर भरेया जे भद्रासन जोड़ें गी मजबूत करने ते गोड़ें च दर्द गी घट्ट करने लेई कारी दा ऐ ते कन्नै गै एहू पेट लेई बी लाहकारी ऐ। वीडियो च सेहत सरबंधी लाहें दे कन्नोकन्नी अंग्रेजी ते हिंदी दौनें भाशाएं च आसन दी प्रक्रिया बारे दस्से गेदा ऐ।

